

摘藻堂四庫全書薈要

集部

欽定四庫全書薈要卷一萬五千七百四十二

集部

于湖集卷三十二

宋 張孝祥 撰

樂府

滿江紅

秋滿蘅皋煙蕪外吳山歷歷風乍起蘭舟不住浪花搖  
碧離岸櫓聲驚鷺漸遠盈襟淚顆淒猶滴問此情能有幾  
人知新相識 追往事歡連夕經舊館人非昔把輕燵  
淺笑細思重憶紅葉題詩誰與寄青樓薄倖空遺迹但

長洲茂苑草萋萋愁如織

又于湖懷古

千古淒涼興亡事但悲陳迹凝望眼吳波不動楚山鰲  
碧巴滇綠駿追風武昌雲旆連江赤笑老姦遺臭到  
如今留空壁邊書靜烽烟息通軺傳銷鋒鏑仰太平  
天子坐收長策蹠踏揚州開帝里渡江天馬龍為匹看  
東南佳氣鬱葱葱傳千億

又思歸寄柳州

秋滿灘

一本作湘

源瘴雲靜曉山如簇動遠思空江小艇高

丘喬木策策西風雙鬢底暉暉斜日朱欄曲試側身回

首望京華迷南北思歸夢天邊鵲游宦事蕉中鹿想

一年好處砌紅堆綠羅帕分柑霜落齒冰盤剥芡珠盈

掬倩春纖縷鱸搗香麝新筠熟

青玉案

餞別劉恭父

紅塵冉冉長安路看風度凝然去唱徹陽關留不住甘  
棠庭院芰荷香渚盡是相思處龜魚從此誰為主好

記江湖斷腸句萬斛離愁休便訴洞庭煙棹楚樓風露  
去作為霖雨

洞仙歌

和清虛先生皇甫坦韻

清都絳闕我自經行慣壁月帶珠星引釣天笙簫不斷  
寶簪瑤珮玉立拱清班天一笑物皆春結得清虛伴  
還丹九轉凡骨親曾換携劔到人間偶相逢依然青眼  
狂歌醉舞心事有誰知明月下好風前相對綸巾岸

蝶戀花

行湘陰

漠漠飛來雙屬玉一片秋光染就瀟湘綠雪轉寒蘆  
花軟軟晚風細起波紋縠落日閒雲歸意促小倚  
蓬窗寫作思家曲過盡碧灣三十六扁舟只在灘頭  
宿

又懷于湖

恰到杏花紅一樹撚指來時結子青無數漠漠春陰  
纏柳絮一天風雨將春去春到家山須小住芍藥  
櫻桃更是尋芳處遶院碧蓮三百畝留春伴我春應

許

又送劉恭父

畫戟旂閑刀入鞘安石榴花影落紅欄小似勸先生須  
飲醕枕中鴻寶微傳妙衮衮鋒車還急詔滿眼瀟湘  
搃是恩波渺歸去槐庭思楚嶠觚稜月曉期分照

又送姚主管橫州

君泛仙槎銀海去後日相思地角天涯路草草杯盤深  
夜語冥冥四月黃梅雨莫拾明珠并翠羽但使邦人

愛我如慈母待得政成民按堵朝天衣袂翩翩舉

鷓鴣天上元設醮

詠徹瓊章夜向闌天移星斗下人間九光倒景騰青簡  
一氣回春遶絳壇瞻北闕祝南山遙知仙仗簇清班  
何人曾侍傳柑宴翡翠簾開識聖顏

又

子夜封章扣紫清五霞光裏珮環聲驛傳風火龍鸞舞  
步入煙霄孔翠迎瑤簡重羽衣輕金童雙引到通明



三湘五筦同民樂萬歲千秋與帝齡

又

憶昔追遊翰墨場武夷仙伯較文章琅函奏號銀臺省  
擅筆書名御苑墻經十載過三湘橫楣麗錦照傳觴  
醉餘吐出胸中墨只欠彭宣到後堂

又

月地雲堦歡意闌仙姿不合住人間驂鸞已恨車塵遠  
泣鳳空餘燭影殘情脉脉淚珊珊梅花音信隔關山

只應楚雨清留夢不耐吳霜綠易斑

又

提刑仲欽行部萬里閱四月而後來歸輒成為太夫人壽

去日清霜菊滿簪歸來高柳絮纏空長驅萬里山收瘴  
徑度層波海不風陰德徧嶺西東天教慈母壽無窮  
遙知今夕稱觴處衣綵還將衣繡同

又為老母壽

阿母蟠桃不記春長沙星裏壽星明金花羅紙新裁詔  
貝葉旁行別授經同犬子祝龜齡天教二老鬢長青

明年今日稱觴處更有孫枝滿謝庭

又贈錢橫州子山

舞鳳飛龍五百年盡將錦繡裹山川王家券冊諸孫嗣  
主第笙歌故國傳居玉鉉擁金蟬祇今門戶慶蟬聯  
君侯合侍明光殿且作橫槎海上仙

又餞劉恭父

浴殿西頭白玉堂湘江東畔碧油幢北辰躔次瞻星象  
南國山川解印章隨步武謝恩光送公歸趣舍人裝

它年若肯傳衣鉢今日應須酌壽觴

又淮西為老人壽

畫得游嬉夜得眠農桑欲徧楚山川問看百姓知公否  
餘子紛紛定不然思主眷酌民言與民稱壽拜公前  
只將心與天通處合住人間五百年

又餞劉恭父

割鐙難畱乘馬東花枝爭看裊長紅袞衣空使斯民戀  
綠竹誰歌入相同回武事致年豐幾多遺愛在湘中

須知楚水楓林下不似初聞長樂鐘

又平國弟生日

楚楚吾家千里駒老人心事正闌渠風流合是堦除玉  
愛惜真成掌上珠 紆綵綬薦芳壺老人還醉弟兄扶  
問將何物為兒壽付與家傳萬卷書

又荊州別同官

又向荊州住半年西風催放五湖舡來時露菊團金顆  
去日池荷疊綠錢 斟別酒扣離絃一時賓從最多賢

今宵拚醉花迷坐後夜相思月滿川

又

憶昔彤庭望日華忽忽枯筆夢生花鬱輪袍曲慙新奏  
風送銀灣犯斗槎追往事甫新瓜飛蓬何事及蘭麻  
一江湘水流餘潤十里河堤築淺沙

又

瞻蹕門前識箇人柳眉桃臉不勝春

一本作香車油壁照彫輪

短襟

衫子新來棹四直冠兒內樣新秋色淨曉粧勻不知

何事在風塵主翁若也憐幽獨帶取妖嬈上玉宸

虞美人

贈盧堅叔

盧敖夫婦驂鸞侶相敬如賓主森然蘭玉滿尊前舉按  
齊眉樂事看年年我家白髮雙垂雪已是經年別今  
宵歸夢楚江濱也學君家兒子壽吾親

又代李弟壽老人

雪花一尺江南北薪盡炊無粟老仙活國試刀圭十萬  
人家生意與春回天公一笑醺陰德賜與長生籍今

朝雪霽壽尊前看我雙親都是地行仙

又無為作

雪消煙漲清江浦碧草春無數江南幾樹夕陽紅點點  
歸帆吹盡晚來風樓頭自壓昭華管我已無腸斷斷  
行雙鴈向人飛纖錦回文空在寄它誰

又

溪西竹榭溪東路溪上山無數小舟却在晚煙中更看  
蕭蕭微雨打疎篷無聊情緒如中酒此意君知否年



時曾向此中行有箇人人相對坐調箏

又

柳梢梅萼春全未誰會傷春意一年好處是新春柳底  
梅邊只欠那人人憑春約住梅和柳略待些時候錦  
帆風送綵舟來却遣香苞嬌葉一齊開

又

羅衣怯雨輕寒透陡做傷春瘦箇人無柰語佳期徙倚  
黃昏池閣等多時當初不似休來好來後空煩惱倩

人傳語更商量只得千金一笑也甘當

鵲橋仙

邢少連送末利

北窻涼透南窻月上浴罷滿懷風露不知何處有花來  
但恠底清香無數炎州珍產吳兒未識天與幽芳獨  
步冰肌玉骨歲寒時倩間止堂中畱住

間止少連堂名

又落梅

吹香成陣飛花如雪不那朝來風雨可憐無處避春寒  
但玉立仙衣數縷清愁萬斛柔腸千結醉裏一時分

付與君不用嘆飄零待結子成陰歸去

又

橫波滴素遙山蹙翠江北江南腸斷不知何處馭風來  
雲霧裏釵橫鬢亂香羅疊恨蠻牋寫意付與瑤臺女  
伴醉時言語醒時羞道醒了休教再看

又平國弟生日

湘江東畔去年今日堂上簪纓羅綺弟兄同拜壽尊前  
共一笑歡歡喜喜渚宮風月邊城鼓角更好親庭一

醉醉時重唱去年詞願來歲強如今歲

又以酒果為黃子點壽

南州名酒北園珍果都與黃香為壽風流文物是家傳  
睨血指旁觀袖手東風消息西山爽氣總聚君家戶  
牖舊時曾識玉堂仙在帝所頻開薦口

又戲贈吳伯承侍兒

明珠盈斗黃金作屋占了湘中秋色金風玉露不勝情  
看天上人間今夕枝頭一點琴心三疊筭有詩名消

得野堂從此不蕭疎問何日尊前喚客

又別立之

黃陵廟下送君歸去上水舡兒一隻離歌聲斷酒杯空  
容易裏東西南北重湖風月九秋天氣冉冉清愁如  
織我家住在楚江濱為頻寄雙魚素尺

又為老人壽

東明大士吾家老子是一元知非二共携甘雨趣生朝  
做萬里豐年歡喜司空山上長沙星裏乞與無邊祥

瑞仙家日月鎮常春笑人說長生久視

南鄉子

送朱元晦行張欽夫邢少連同集

江上送歸舫風雨排空浪拍天賴有清尊澆別恨悽然  
寶蠟燒花看吸川楚舞對湘絃煖響圍春錦帳羶坐  
上定知無俗客俱賢便是朱張與少連

畫堂春

上老母壽

蟠桃一熟九千年仙家春色無邊畫堂日煖卷非煙晝  
永風妍看取䟽封湯沐何妨頻棹觥方瞳綠髮對

儒仙歲歲尊前

于湖集卷三十二

謹案卷二十九第六頁前六行祖白粥原本粥上  
衍安字今刪

卷三十一第九頁後一行歸期猶未原本未訛夫  
據毛選于湖詞改







總校官庶吉士臣張能照

校對官中書臣葉蘭

謄錄舉人臣任銜葵

謄錄監生臣鄧培善

欽定四庫全書薈要

集部

于湖集卷三十六

三五

詳校官助教臣謝登雋



欽定四庫全書薈要卷一萬五千七百四十三

集部

于湖集卷三十三

宋 張孝祥 撰

樂府

柳梢青

餞別蔣德施  
栗子求諸公

重陽時節滿城風雨更催行色隴樹寒輕海山秋老清  
愁如織 一杯莫惜畱連我亦是天涯倦客後夜相思

水長山遠東西南北

又

元宵何高士  
說京師舊事

今年元夕探盡江梅都無消息草市梢頭柳莊深處雪  
花如席一尊鄰里相過也隨分移時換節玉輦端門  
紅旗夜市憑君休說

又探梅

溪南溪北玉香消盡翠嬌無力月淡黃昏煙橫清曉都  
無消息無聊更遶空枝斷魂遠重招怎得驛使歸來  
戍樓吹斷空成悽惻

踏莎行

楊柳東風海棠春雨清愁冉冉無來處曲徑驚飛蛺蝶  
叢回塘凍濕鴛鴦侶舞徹霓裳歌殘金縷薜蘿白芷  
愁煙渚不識陽臺夢裏雲試聽華表歸來語

又

長沙牡丹花極小戲作此詞并以  
二枝為伯承欽夫諸兄一觴之薦

洛下根株江南栽種天香國色千金重花邊三閣建康  
春風前十里揚州夢油壁輕車青絲短鞵看花日日  
催賓從而今何許定王城一枝且為鄰翁送

又

荆南作

旋葺荒園初開小徑物華還與東風競曲檻暉暉落照  
明高城冉冉孤煙暝柳色金寒梅花雪靜道人隨處  
成幽興一杯不惜小淹畱歸期已理滄浪艇

又

萬里扁舟五年三至故人相見尤堪喜山陰乘興不須  
回毗耶問疾難為對不藥身輕高談心會匆匆我又  
成歸計它時江海肯相尋綠蓑青蒻看清貴

又

五月十三  
日月甚佳

藕葉池塘榕陰庭院年時好月今宵見雲鬢玉臂共清  
寒冰綃霧縠誰裁剪撲粉香綿侵塵寶扇遙知掩抑  
成淒怨去程何許是歸程離觴為我深深勸

又

送別劉  
子思

古屋萊祠孤舟野渡長年與客分携處漠漠愁陰嶺上  
雲蕭蕭別意溪邊樹我已北歸君方南去天涯客裏  
多歧路須君早出瘴煙來江南山色青無數

又

壽黃堅叟  
併以送行



時雨初晴詔書隨至邦人父老為君喜十年江海始歸  
來祥曦殿裏攬班對 日月開明風雲感會切須穩上  
平戎計天教慈母壽無窮看君黃髮腰金貴

又

為朱  
漕壽

桂嶺南邊湘江東畔三年兩見生申旦知君心地與天  
通天教仙骨年年換 趁此秋風乘槎霄漢看看黃紙  
書來喚但令丹鼎永頻添莫辭酒盞春無筭

醜奴兒

張仲欽母  
夫人壽

年年有箇人生日誰似君家誰似君家八十慈親髮未  
華 棠陰閣上棠陰滿滿勸流霞滿勸流霞來歲應添  
宰路沙

又張仲欽生  
日用前韻

伯鸞德耀賢夫婦見說宜家見說宜家庭砌森森長玉  
華 天公遣注長生籍服日食霞服日食霞壽紀應須  
海筭沙

又王公澤為予言  
查山之勝戲贈

十年聞說查山好何日追遊木落霜秋夢想雲溪不那  
愁 主人好事長畱客尊酒夷猶一笑登樓興在西峯  
上上頭

又

十分濟楚邦之媛此日追遊雨霽雲收夢入瀟湘不那  
愁 主人白玉堂中老曾侍凝旒滿酌瓊舟即上虛皇  
香案頭

又

珠燈壁月年時節纖手同携今夕誰知自撚梅花勸一  
卮逢人問道歸來也日日佳期管有來時趣得收燈  
也未遲

又

無雙誰似黃郎子自鄮無譏月滿星稀想見歌場夜打  
圍畫眉京兆風流甚應賦蚱蜢楊柳依依何日文簫  
共駕歸

浣溪沙

劉恭父  
席上

卷旗直入蔡州城只倚精忠不要兵賊營半夜落妖星  
萬旅雲屯看整暇十眉環坐却娉婷白麻早晚下天  
庭

又

玉節珠幢出翰林詩書謀帥眷方深威聲虎嘯復龍吟  
我是先生門下士相逢有酒且教斟高山流水遇知  
音

又

絕代佳人淑且真雪為肌骨月為神燭前花底不勝春  
倚竹袖長寒捲翠凌波戰小暗生塵十分京洛舊家  
人

又

妙手何人為寫真只難傳處是精神一枝占斷洛城春  
暮雨不堪巫峽夢西風莫障庾公塵扁舟湖海要詩  
人

又 瑞香

膺後春前別一般梅花枯淡水仙寒翠雲裹著紫霞冠  
仙品只今推第一清香元不是人間為君更試小龍  
團

又餞鄭憲

寶蠟燒春夜影紅梅花枝傍錦薰籠曲瓊低捲瑞香風  
萬里江山供燕几一時賓主看談鋒問君歸計莫匆  
匆

又親舊  
口相訪

六客西來共一舟  
吳兒蹋浪剪輕鷗  
水光山色翠相浮  
我欲吹簫明月下  
略須停棹晚風頭  
從前五度到蘄州

又

已是人間不繫舟  
此心元自不驚鷗  
卧看駭浪與天浮  
對月只應頻舉酒  
臨風何必更搔頭  
暝煙多處是神州

又



冉冉幽香解鈿囊蘭橈煙雨暗春江十分清瘦為蕭郎  
遙憶牙檣收楚纜應將玉筯點吳粧有人縈斷九回  
腸

又

樓下西流水拍堤樓頭日日望春歸雪晴風靜燕來遲  
留得梅花供伴額要將楊葉畫新眉莫教辜負早春  
時

又  
去荆  
州

公  
方舡載酒下江東  
簫鼓喧天浪拍空  
萬山紫翠映雲重  
擬看岳陽樓上月  
不禁石首岸頭風  
作牋我欲問龍

又  
次韻戲馬夢山與妓作別

羅襪生塵洛浦東  
美人春夢瑣窗空  
眉山蹙恨幾千重  
海上蟠桃畱結子  
渥洼天馬去追風  
不須多怨主人公

又  
夢山未釋然再作

一片西飛一片東高情已逐落花空舊歡休問幾時重  
結習正如刀舐蜜掃除須著絮因風請君持此問龐  
公

又

鵲樓高晚雪融鴛鴦池暖暗潮通鬱金黃染柳絲風  
油壁不來春草綠闌干倚徧夕陽紅江南山色有無  
中

又

妬婦灘頭十八姨，顛狂無賴占佳期。  
喚它滕六把春欺，  
僂僂鶯鶯并燕燕，恹恹柳柳與梅梅。  
東君獨自落便宜。

又 洞庭

行盡湘瀟到洞庭，楚天闊處數峯青。  
旗梢不動晚波平，  
紅蓼一灣紋纈亂，白魚雙尾玉刀明。  
夜涼舡影浸疎星。

又 坐上十八客

同是瀛洲冊府仙只今聊結社中蓮  
胡笳按拍酒如川  
喚起封姨清晚景更將荔子薦新圓  
從今三夜看嬋娟

又用沈約之韻

細仗春風簇翠筵  
爛銀袍拂禁爐煙  
旃書名字壓宮垣  
太學諸生推獨步  
玉堂學士合登仙  
乃翁種德滿心田

又賦傲之提刑繡扇

只說閩山錦繡幃忽從團扇得生枝綢紅衫子映豐肌  
春線應怜壺漏永夜針頻見燭花推塵飛一騎憶來  
時

又  
煙水亭蔡  
定夫置酒

灩灩湖光綠一圍脩林斷處白鷗飛天機雲錦蘸空飛  
乞我百弓真可老爲公一飲醉忘歸扁舟日日弄晴

暉

又

晚雨瀟瀟急做秋西風掠鬢已颼颼燭花明夜酒花浮

醉眼定知非妙賞

闕

詞端為

闕

畱想君涇渭不同

流

又

母氏生朝老  
者同在舟中

穩泛仙舟上錦帆桃花春浪舞清灣壽星相伴到人間

黃石公傳三百字西王母授九霞丹銀潢有路接三

山

又

貢茶沈水為  
楊齊伯壽

北苑先春小鳳團  
炎州沉水勝龍涎  
殷勤送與繡衣仙  
玉食鄉來思苦口  
芳名久合上凌煙  
天教富貴出長年

又

霜日明霄水蘸空  
鳴鞘聲裏繡旗紅  
澹煙衰草有無中  
萬里中原烽火北  
一尊濁酒戍樓東  
酒闌揮淚向悲風

又  
韻再用



宮柳垂垂碧照空  
九門深處五雲紅  
朱衣只在殿當中  
細撚絲梢龍尾北  
緩携綸旨鳳池東  
阿婆三五笑春風

又

日暖簾幃春晝長  
纖纖玉指動抨床  
低頭佯不顧檀郎  
荳蔻枝頭雙蛺蝶  
芙蓉花下兩鴛鴦  
壁間聞得唾茸香

又

侑劉恭父別酒

射策金門記昔年又交藩翰入陶甄不妨衣鉢再三傳  
粉淚但能添楚竹羅巾誰解繫吳舡捧盃猶願小畱  
連

浪淘沙

琪樹間瑤林春意深深梅花還被曉寒禁竹裡一枝斜  
向我欲訴芳心樓外卷重陰玉界沉沉何人低唱醉  
泥金掠水飛來雙翠碧應寄歸音

又

溪練寫寒林雲重煙深樓高風惡酒難禁徒倚欄干誰  
共語江上愁心清興滿山陰鴻斷魚沉一書何啻直  
千金獨撫瑤徽絃欲斷憑寄知音

定風波

鈴索聲乾夜未央曲闌花影步淒涼莫道嶺南冬更暖  
君看梅花如雪月如霜見說牆西歌吹好玉人扶坐  
勸飛觴老子婆婆成獨冷誰省自挑寒炷自添香

望江南

贈譚獻可

譚子醉獨立睨東風未試玉堂揮翰手只今楚澤釣魚  
翁萬事舉杯空 謀一笑一笑與君同身老南山看射  
虎眼高四海送飛鴻赤岸晚潮通

又南嶽銓  
德觀作

朝元去深殿扣瑤鐘天近月明黃道冷參回斗轉碧霄  
空身在九光中 風露下環珮響丁東玉案燒香紫翠  
鳳松壇移影動蒼龍歸路海霞紅

醉落魄

輕黃澹綠可人風韻閑裝束多情早是眉峯蹙一點秋  
波閒裡覷人毒 桃花庭院光陰速銅鞮誰唱大堤曲  
歸時想是櫻桃熟不道秋千誰伴那人蹴

桃源憶故人

朔風弄月吹銀霰簾幙低垂三面酒入玉肌香軟壓得  
寒威歛 檀槽乍撚么絲慢彈得相思一半不道有人  
腸斷猶作聲聲顫

臨江仙

試問梅花何處好與君藉草携壺西園清夜片塵無一  
天雲破碎兩樹玉扶疎誰辱昭華吹古怨散花便滿  
衣裾只疑幽夢在清都星稀河影轉霜重月華孤

又

問訊宜樓樓下竹年來應長新篁使君五嶺又三湘舊  
游知好在熟處更難忘尚念論心舒歎否只今湖海  
相望遙憐陰過酒尊涼舉觴須酌我門外是清江

如夢令

木犀

花葉相遮相映雨過翠明金潤折得一枝歸滿路清香  
成陣風韻風韻寄贈綺窓雲鬢

于湖集卷三十三

欽定四庫全書薈要卷一萬五千七百四十四

集部

于湖集卷三十四

宋 張孝祥 撰

樂府

菩薩蠻 立春

絲金縷翠幡兒小裁羅撚線花枝裊明日是新春春風  
生鬢雲 吳霜看點點愁裡春來淺只願此花枝年年  
長帶伊

又

諸客赴東  
都之集



庭葉翻翻秋向晚涼砧敲月催金剪樓上已清寒不堪  
頻倚欄鄰翁開社甕喚客情應重不醉且無歸醉時  
歸路迷

又

恰則春來春又去憑誰說與春教住與問坐中人幾回  
迎送春明年春更好只怕人先老春去有來時願春  
長見伊

又

東風約略吹羅幕一簷細雨春陰薄試把杏花看濕紅  
嬌暮寒佳人雙玉枕烘醉鴛鴦錦折得最繁枝暖香  
生翠幃

又  
贈箏妓

琢成紅玉纖纖指十三絃上調新水一弄入雲聲月明  
天更青  
匆匆鶯語囀待寫昭君怨寄語莫重彈有人  
愁倚欄

又

玉龍細點三更月庭花影下餘殘雪寒色到書幃有人  
清夢迷 墻西歌吹好燭煖香閨小多病怯盃觴不禁  
冬夜長

又

登浮  
玉亭

江山佳處畱行客醉餘老眼迷空碧獨倚最高樓乾坤  
日夜浮 微風吹笑語白日魚龍舞此意忽翩翩憑虛  
吾欲仙

又

雪消牆角收燈後野梅官柳春全透池閣又東風燭花  
燒夜紅一尊畱好客歌盡闌干月已醉不須歸試聽  
烏夜啼

又

溶溶花月天如水闌干小倚東風裡夜久寂無人露濃  
花氣清悠然心獨喜此意知何意不似隱牆東燭花  
圍坐紅

又

夜坐清  
心閣

暗潮清漲蒲塘晚斷雲不隔東歸懶堂上晚風涼藕花  
開處香夜航人不渡白鷺雙飛去待得月華生携筇  
獨自行

又

縹緲飛來雙綠鳳雨疎雲澹撩清夢蘭薄未禁秋月華  
如水流采香溪上路愁滿參差樹獨倚晚樓風斷霞  
縈素空

又

蘼蕪白芷愁煙渚曲瓊細卷江南雨心事怯衣單樓高  
生晚寒雲鬟香霧濕翠袖淒餘泣春去有來時春從  
沙際歸

又

艤舟  
采石

十年長作江頭客檣竿又掛西風席白鳥去邊明楚山  
無數青倒冠仍落珮我醉君須醉試問識君不青山  
與白鷗

又

和州守胡  
明秀席上

乳羝屬國歸來早知君膽大身猶小一節不須論功名  
看致君鎮西樓上酒父老為公壽更祝太夫人年年  
封詔新

又

胭脂淺染雙珠樹東風到處嬌無數不語恨厭厭何人  
思故園故園花爛漫笑我歸來晚我老只思歸故園  
花雨時

又

與同舍  
游湖歸

吳波細卷東風急斜陽半落蒼煙濕一棹采菱歌倚欄  
人奈何天公憐好客酒面風吹白更引十玻璃月明  
騎鶴歸

又

冥濛秋夕溥清露玉繩耿耿銀潢注永夜滴銅壺月華  
樓影孤佳人紆絕唱翠幙叢霄上休勸玉東西烏鴂  
枝上啼

西江月



問訊湖邊春色重來又是三年東風吹我過湖舡楊柳  
絲絲拂面世路如今已慣此心到處悠然寒光亭下  
水如天飛起沙鷗一片

又

風定灘聲未已雨來蓬底先知岸邊楊柳最憐伊憶得  
舡兒曾繫湖霧平吞白塔茅簷自有青旗三杯村酒  
醉如泥天色寒呵且睡

又重九

冉冉寒生碧樹盈盈露濕黃花故人玉節有光華高會  
仍逢戲馬萬事只今如夢此身到處為家與君相遇  
更天涯拚了茱萸醉把

又

張欽  
夫壽

諸老何煩薦口先生自簡淵衷千年聖學有深功妙處  
無非日用已授一編圮下却須三顧隆中鴻鈞早晚  
轉春風我亦從君賈勇

又

代五三弟  
為老母壽

慈母行封大國老仙早上蓬山天憐陰德徧人間賜與  
還丹七返莫問清都紫府長教綠鬢朱顏年年今日  
綵衣斑兄弟同扶酒盞

又  
此  
斲碎李君達才當靖康建炎之間以諸生起  
兵河東屢摧強敵蓋未知其事重為感嘆賦

不識平原太守向來水北山人世間功業謾虧成華髮  
蕭蕭滿鏡幸有田園故里聊分風月江城西湖西畔  
晚波平袖手時來照影

又

樓外疎星印水樓頭畫燭烘簾憑高舉酒恨厭厭征路  
虛無指點酒興因君開闊山容向我增添一鈎新月  
弄纖纖濃霧花房半斂

又

阻風三  
峯下

滿載一舸秋色平鋪十里湖光波神畱我看斜陽放起  
鱗鱗細浪明日風回更好今宵露宿何妨水晶宮裡  
奏霓裳準擬岳陽樓上

又

桂州同僚餞別

窓戶青紅尚濕主人已作歸期坐中賓客盡鄒枚盛事  
它年應記別酒深深但勸離歌緩緩休催扁舟明日  
轉清溪好月相望千里

又

以隋索靖小字法華經及古器為老人壽

漢鑄九金神鼎隋書小字蓮經剛風劫火轉青冥護守  
應煩仙聖昨夢歸來帝所今朝壽我親庭只將此寶  
伴長生談笑中原底定

又飲百花亭為武夷樞密先生作亭望廬  
山雙劍峯為惡竹所蔽是夕盡代去

落日鎔金萬頃晴嵐洗劍雙鋒紫樞元是黑頭公佳處  
因君愈重分得湖光一曲喚回廬獄千峯清尊今夜  
偶然同早晚商巖有夢

又為樞密太夫人壽

疇昔通家事契只今兩鎮交承起居樞密太夫人綠鬢  
斑衣相映乞得神仙九醞祝教福祿千春台星直上  
壽星明長見門闌鼎盛

減字木蘭花

江陰州治  
漾花池

佳人絕妙不惜千金頻買笑  
燕姁鶯嬌始遣清歌透碧  
霄  
玉人好事更倒一尊畱  
客醉我醉思家月滿南池  
欲漾花

又

一尊畱夜寶蠟烘簾光  
澈射凍合銅壺細聽冰簷夜剪  
酥  
清愁冉冉酒喚紅潮登玉臉  
明日重看玉界瓊樓  
特地寒

又

愛而不見立馬章臺空便面想像娉婷只恐丹青畫不成  
詩人老去恰要鶯鶯相伴住試與平章歲晚教人枉斷腸

又

阿誰曾見馬上牆陰通半面玉立娉婷一點靈犀寄目成  
明朝重去人在橫溪溪畔住喬木千章搖落霜風只斷腸



又

琵琶亭林守  
王倅送別

江頭送客楓葉荻花秋  
瑟瑟絃索休彈清淚無多怕濕  
衫故人相遇不醉如何歸得去  
我自忘歸煙滿空江  
月滿堤

又

二十六  
日立春

春如有意未接年華春已至  
春事還新多得年時五日  
春  
春郊便綠只向臘前春已足  
屈指元宵正是新春  
二十朝

又

黃堅叟  
母生日

慈闈生日見說今年年九十戲綵盈門大底孩兒七箇  
孫人間喜事只這一般難得似願我雙親都似君家  
太淑人

又

贈尼師舊  
角妓也

吹簫汎月往事悠悠休更說拍碎琉璃始覺從前萬事  
非清齋淨戒休作斷腸垂淚債識破囂塵作箇逍遙  
物外人

又

人間奇絕只有梅花枝上雪有箇人人梅樣風標雪樣  
新芳心不展嫩綠陰陰愁冉冉一笑相看試薦冰盤  
一點酸

又

柳花搦柳知道東君留意久慘綠愁紅憔悴都因一夜  
風輕狂蝴蝶擬欲扶持心又怯要免離披不告東君  
更告誰

清平樂

殿廬  
有作

光塵撲撲宮柳低迷綠鬪鴨闌干春詰曲簾額微風繡  
蹙碧雲青翼無憑困來小倚銀屏楚夢不禁春晚黃  
鸝猶自聲聲

又

楊侯書院聞  
酒所奏樂

油幢畫戟玉鉉調春色勲閥諸郎俱第一風流前輩敵  
玉人雙鞢華驄翠雲深處消搖有客畱君東閣時聞  
風下笙簫

又梅

吹香嚼蕊獨立東風裏  
玉凍雲嬌天似水  
羞殺夭桃濃李  
如今見說闌干不禁月冷霜寒隴上驛程人遠樓頭戍角聲乾

又

壽叔父

英姿慷慨獨立風塵外  
湖海平生豪氣在行矣雲龍際會  
充庭蘭玉森森一觴共祝修齡此地去天尺五明年持橐西清

又

向來省戶謀國參份呂暫借良籌非再舉談笑肅清三  
楚良辰上客然佯奏篇猶記傳香此日一罇相屬它  
時同在巖廊

點絳脣

素道

四到蘄州今年更是逢重九應時納祐隨分開尊酒  
屢舞婆娑醉我平生友休回首世間何有明月疎疎柳

又

錢劉  
恭父

綺燕高張玉潭月麗玻璃滿旆霞行卷無復長安遠

夏木陰陰路裊薰風轉空畱戀細吹銀筦別意隨聲緩

又

萱草榴花畫堂永晝風清暑麝團菰黍助泛菖蒲醕

兵辟神符命續同心縷宜歡聚綺筵歌舞歲歲酬端午

卜筮子

雪月最相宜梅雪都清絕去歲江南見雪時月底梅花  
發今歲早梅開依舊年時月冷艷孤光照眼明只欠

些兒雪

訴衷情

中秋不見月

晚煙斜日思悠悠西北有高樓十分準擬明月還似去年遊  
飛玉箏卷瓊鉤喚新愁姮娥貪共暮雨朝雲忘  
了中秋

又

牡丹

亂紅深紫過羣芳初欲減春光花王自有標格塵外鎖  
韶陽畱國艷問仙鄉自天香翠帷遮日紅燭通宵與



醉千場

好事近

木犀

一朵木犀花珍重玉纖新摘  
揜向遠山深處占十分秋色  
滿園桃李鬧春風漫紅紅白白  
爭似淡粧嬌面伴  
蓬萊仙客

又

冰花

萬瓦雪花浮應是化工融結  
仍看牡丹初綻有層層千葉  
鏤冰剪水更鮮明說道真奇  
絕來報主人佳兆慶

我公還闕

南歌子

仲彌性  
席上

曾到蘄州不人人說使君使君才具合經綸小試邊城  
早晚上星辰佳節重陽近清歌午夜新舉杯相屬莫  
辭頻後日相思我已是人

又

贈吳  
伯承

人物羲皇上詩名沈謝間漫郎元自謾為官醉眼瞢騰  
只擬看湘山小隱今成趣鄰翁獨往還野堂梅柳尚

春寒且趣華燈頻泛酒舡寬

霜天曉角

柳絲無力冉冉縈愁碧繫我舡兒不住楚江上晚風急  
棹歌休怨抑有人離恨極說與歸期不遠剛不信淚  
偷滴

生查子

遠山眉黛橫柳開青眼樓閣斷霞明簾幙春寒淺  
枉延玉漏遲燭怕金刀剪明月忽飛來花影和簾卷

長相思

小樓重下簾櫳萬點芳心綠間紅鞦韆圖畫中  
草茸茸柳鬆鬆細卷玻璃水面風春寒依舊濃

憶秦娥

元夕

元宵節鳳樓相對鰲山結鰲山結香塵隨步柳梢微月  
多情又把珠簾揭遊人不放笙歌歇笙歌歇曉煙輕  
散帝城宮闕

蒼梧謠

錢劉恭父

歸十萬人家兒樣啼公歸去何日是來時

又

歸獵獵薰風颭繡旗攔教住重舉送行盃

又

歸數得宣麻拜相時秋前後公袞更萊衣

于湖集卷三十四

欽定四庫全書薈要卷一萬五千七百四十五

集部

于湖集卷三十五

宋 張孝祥 撰

尺牘

代摠得居士上相府

某一介遲莫流落田野去歲一拜光範披露愚衷即蒙  
某官特達恩遇付以郡寄闕期甫及某敢以病自列亟  
請祠祿屬者又蒙相公起之間散復畀守符拜命周章  
不敢辭避仰惟相公光輔聖神默運天綽海內善類悉

歸範圍元功溥博隨物賦形坏冶一陶固無難事獨某  
孤畸齟齬過軫眷慈委曲生成倍勞造化始終收拾不  
待禱祈某豈有才智術業動公相哉直以某手足虧折  
家事狼狽憂患摧傷其窮已甚姑欲假此一官奪之於  
寒餓之水火此賜大矣重念某家世歷陽兵火之後未  
嘗輕去墳墓昨者山陽之命雖為佳郡然空道從出使  
傳往來某憂患薰心難堪委寄而松楸姻戚又有淮東  
西之阻焉今茲寢丘在他人得之或以為遠特與某鄉

黨氣俗相去甚近頃伯氏初登科第靖康倣擾攝尉期  
思某也今懷太守章臨之豈不甚寵且祿優足以仁族  
事簡足以養病使某自謀不過如此感恩荷德負戴靡  
勝惟當激勵綿薄旦旦惟念布宣主上德澤廣相公惠  
養黎元輯和封疆之意事有可為敢愛軀命伏乞鈞察  
某之子孝祥伏蒙相公矜憐成就擢侍殿坳復承闕員  
慙兼書命一緣鈞造不出他門孝祥愚鄙稚騃何以堪  
此寵榮然某早聞祖考之訓子之能仕父教之忠奉以



周旋罔敢失墜謹當夙夜訓飭使仰報君相簡擢非常之恩皎然此心有死無易

陳太博

某伏蒙太博貺以緘翰駢儷之文語新意工抑某也不足以辱此執事者姑欲借烏有先生東都主人以發其辭耳又惟疇昔相從則世俗之禮宜不必講乃今不然豈外之耶不敢效尤輒具幅紙即日燕居多暇台候定復何如某何者敢冒清切之除游揚之助洪矣竊惟執

事閒逸許久以有用之才而袖手旁觀人謂斯何北門  
西掖行有寵除頃戒諭山陽書適家君弓外祠故不果  
遣而來介亦復不取回訊亟去長者尚亮之否聞開門  
受徒橫經問疑者日益可勝欽嘆能推其餘以誨之幸  
也

董守

廣陵自昔豪華兵革之後瘡痍未復主上顧憂謀帥甚  
艱夫欲翼蔽淮甸安集流逋疆場輯睦而威令自嚴使

傳周旋而趣辦不擾非執事尚誰望哉自聞十乘啓行  
日欲具書問左右因循未果記室先之辭義燦然深佩  
隆譙可量愧感薄遽占謝未究所懷

蘇倅

某晚學備數西省已劇超踰之媿偶茲乏使又俾兼攝  
贊書恐懼怵惕亡以自容所冀因來有以誨之廼今不  
然甚失望也正學博識當在本朝久茲回翔士論甚鬱  
敢乞益護眠食以須三節之行

明守趙敷文

某頃寓居鄮郭餘十年王母馮夫人歿葬西山皇妣孫夫人以婦從姑而世父待制公季父莆田丞公以子從母皆葬其下故家視四明猶鄉里執事以慈惠之師有來作牧布宣德意使田野按堵民物康阜則死者有知抑將滲漉膏澤安於地下惟公念之

歐公書豈惟翰墨之妙而辭嚴義正千載之下見者興起某何足以辱公此賜也哉而又先正所藏印色猶新

輟公秘笈尤所懷感

與宣城守

屬者伏承報政輔郡易鎮大府遴選之久及茲成命既  
放士大夫雜然謂宜而某獨有歎也夫道德高一世文  
章追在昔而徒以良二千石視之使狹厥施於一州將  
若之何宛陵於今最郡涪公八十字蓋圖經也儻未即  
來觀暇日徜徉詠歌真有足樂者幸少安之

嚴守朱新仲

某比者還便奉真帖并石刻二詩龍溪序引既再拜欽  
誦斯文之妙三復卒業又再拜曰某何者而先生乃欲  
教誨收拾甚惠而今而後知不肖之身猶可自置於大  
君子之門其不忍棄捐如此也即日春事已晚不審坐  
觀事物之變台候何如某為養竊祿了無可言何當侍  
前少承耆德之緒論引望齋閣卷卷何極

某春晚嘗具記謝石刻序引之賜蓋委一親戚行其人  
自臨安取間道入閩未嘗至大府以故其書不達復以

見歸伏念某鄉里晚出而於事先生長者之禮其略如此則某既無可言者然猶自列云云者萬有一先生尚察其無它而恕之也即日不審台候何如經綸德業歛之一州使年穀屢豐閭里安阜者固哲人之細事耳某戇愚不學資淺齒少而今茲除授乃先衆俊朝夕惴懼先生不憐而教之復被褒惜之辭謹再拜辭避不敢當也日俟召還以既願見之悰敢乞視時崇護即膺三節之行

某皇恐死罪敢言之惟先生哀憐幸聽某伯父凡三人  
長尚書次嘗得官矣建炎俶擾尚書奉大母馮夫人渡  
江諸弟悉從次伯父既娶獨顧松楸不忍去以死惟餘  
一女於某姊也馮夫人以其無父母愛異它孫嫁嚴陵  
朱氏有子曰俊又馮夫人屬纊時謂尚書曰吾憐二十  
九無孫汝異時能官其外孫吾不恨矣二十九蓋次伯  
父行也紹興二十五年伯父舍其子而官俊又用馮夫  
人治命以為已外生而任之命下而俊又之父死今終



喪矣而其家日貧困俊人大母無恙內外數十口寡姊以書抵某言狀某欲盡取以來則寡姊義無委姑而去欲周之則不給朝夕思之莫知所以為計伏念先生為之師帥使境內有一夫失所者先生任以為己責況此十口嗷嗷饑餓瀕死先生不知之則已苟知之豈不惻然動心也哉故敢冒布腹心伏惟先生施大惠於不報之地或有所謂醯局者月得二三十千使俊人託其名而食其祿以養其重親以活其兄弟姊妹以緩其旦暮

溝壑之憂以紓手足之念則先生所以惠某者孰大於是

某伏蒙寵頒四公遺帖墨本語意真切字畫勁正可以想見當時風俗之厚先生刻之樂石以表章之其於學士大夫惠矣而某遂拜賜尤極欣荷也

某晚學叨恩以榮為懼所冀肯賜某以言使某朝夕服膺周旋不失其身而今茲溢於牋牘者顧非某疇昔之望怵惕移日伏自惟念豈不肖蒙陋不足以辱進於君

子之列而當世巨公不屑教誨之也耶不然願有以賜之也

明守姜祕監

祕監名德之重學士大夫東鄉馳心日日而望曰庶乎公之來歸式是百辟吾輩之士有所因倚典章禮文有所訂正乃今猶未何也伏惟詔追近在朝夕敢以私告某伏自念今世先達巨公收拾寒畯哀窮悼屈者莫如門下故有微懇敢冒言之郭世模者自北角相從閔達

辯智溢於文辭蓋嘗慕用屈馬平時議論不苟志趣超邁竊謂宜在門下士之列世模來都干祿且二年不肯一扣鼎貴人乃不憚重江之阻願走下風世模之志勤矣誠恐不能自徹請於某以書先焉某亦惟祕監未得斯士故敢遂以為門下獻世模字從範晉人

姜叔永

某有一士度叔永必喜與之游請言之晉人郭從範者今年三十能詩文呂居仁曾吉甫諸老先生至忘年目

之為小友年益長文益奇疏爽俊特氣槩凜然可畏也  
僕童丱與之同硯席相從十五年如一日盃觴流行十  
紙立就清婉精緻若宿造者蓋於文無所不能而又敏  
妙來中都調官再歲未有得深慕祕監亦惟公父子平  
時所以取士抑從範決不遺雖微某之言亦將以為上  
客凡其人之可不可某不敢重言惟叔永自知之亦不  
敢以交游之舊而欺門下也

紹興王與道

某伏承尚書以八座舊德內閣隆名出節建牙往殿東  
道雖老成慙去措紳貪戀然藩屏強固王室益尊某誤  
叨恩除屬有謁制不果躬造門闌敢謂謙光猥賜降臨  
感懼交并無所容措尚期朝著獲望羽儀少叙愚悃謹  
此仰布下執事

臺守沈德和

獻歲發春共惟開府云初神扶斯文台候萬福伏念江  
干一見請辭拳拳戀德厥明將再造詣拜所賜教則舟

馭既凌江矣丹丘赤城今號輔郡蓬萊雲物仙聖之所  
出沒可以朝夕賓接祕監以當世名德均逸剖符儒者  
之榮何以逾此顧如公宜在本朝潤色王度不應待奏  
最而歸耳即日某為養苟祿無可言者日佇召還敢乞  
視時珍護眠食

于湖集卷三十五

欽定四庫全書薈要卷一萬五千七百四十六

集部

于湖集卷三十六

宋 張孝祥 撰

尺牘

與池州守周尚書

某獨學寡聞涉道甚淺願從當世先生長者受業解惑  
發其蔽蒙尚書宗工鉅儒為薦紳師表一經品題便作  
佳士某竊懷執鞭之慕實自稚齒有志莫遂曠茲歲年  
引向下風此誠難喻



尚書德宇純粹道心精微古學淵奧包羅象數之表辯  
知宏達超軼英豪之右入侍帷幄出分顧憂名績隱然  
聞者為起願聞明制趣還廟堂增重本朝華夷震疊幸  
甚某晚出寒鄉叨陪諸彥為郎滿歲躡侍殿砌此皆先  
達耆雋過聽妄庸褒借吹噓而上聞也惟是獻納責隆  
大懼無以稱塞盛指苟未棄捐有以教詔使免於戾敢  
以請某自聞尚書舟虞出峽建牙江表日欲具一紙書  
問左右是致疇昔景慕之悵敢意謙尊先垂雲體軒昂

滿幅若接光塵而傾意氣拜嘉周章弗獲辭避有愧而  
已還使匆匆萬不及一

與廣帥蘇龍圖

惟黃州之後奕世載德執事又以文行政術為名公卿  
番禺以南華戎錯居蕩以鉅海持節作鎮未閱歲年威  
懾島夷琛贐充溢颶霧屏息人無疾瘍勲績之茂當有  
殊賞願觀三接之寵抒所蓄積以補遺闕亦使故國喬  
木之望增重本朝幸也某拜謁未期敢以崇養為請

與廣憲

某傾聽中朝薦紳之言獨嶺南去國數千里奉使有指  
乃屬執事上無復有憂矣某願見君子請所以養士民  
之術其路無由伏惟治績之美諸公當有裏言尺一召  
還遂將承接

答吳子仁

某辭奉光塵坐彌歲月歸鄉盛德勞於夢想獨因循少  
暇只尺之書不時登於師門敢謂謙隆賜以翰墨慰薦

華寵甚非門人弟子所宜蒙被辭讓弗獲盤辟跼蹐有愧而已伏蘄幸察

某晚出寒鄉首蒙中書舍人先生收寘門牆待以國士今茲誤叨朝選躡據要津寔執事者為之權輿共惟此恩何以圖報惟當金石一心期不累知己爾

先生德業之盛固不待稱贊置之左右誰曰不宜而曠日於此徜徉閒居雖高懷曠達觀物之初不以用捨繫心然使天子不盡得賢烏乎可哉伏惟廟論當有裏言

吾黨之士旦旦而望

答呂教授

遠赴濠梁已臨魯類諸儒得明師斯道有託甚善同年  
兄德履純固學問淵博正宜師表膠庠遺之諸侯非所  
稱也廟堂當有裏言願少俟之

遠遣書尺撫存甚渥仰認眷意之厚然有疑也同年義  
均兄弟不當雙緘四六語寵則寵矣情則甚踈豈少誤  
耶不敢效尤輒自削去非簡也惟深亮此意

答范司戶

捐書甚寵非所當受又惟晚學冒進來教以頌不以規  
大非疇昔冀望於同年者藏去悚仄而已秋氣高潔伏  
惟坐曹清暇體中勝常某出寒鄉寂寞之濱濫超衆偶  
實自知其不可而公朝乃以備史官之闕朝夕惴惴非  
朋舊推揚之過有是哉伏紙無任愧惕

答樊憲

恭以學造聖涯文傳正法所宜在上左右抒發嘉猷以

輔教化奉使遠方與議誠鬱願聞明詔入踐禁嚴吾道幸甚

某晚出寒鄉叨陪諸彥為郎滿歲躡侍殿坳茲蓋先生長者獎與延譽轉而上聞訖用臻此第獨學孤陋誤當獻納之地亟辭弗獲震悸靡寧尚惟大雅豈弟博約後來有以教之幸甚

間者閣馬不奉書記敢意謙勤委以翰墨粲然黼黻增賁陋質寵則寵矣稱塞謂何不腆之辭少陳愚慙非敢

言報也

答衢州陳守

某敢冒言之公之屬縣吏喻其姓者子才尚書郎之子  
子才與家君游相好也某為郎時子才為同舍不以某  
不肖忘年顧接又好也今其子以薦及格當詣考功誠  
恐吏持微文濡滯其行望賢使君哀憐之俾以時受代  
子才老矣舐犢之念切人誰無子惟賢使君哀憐之僭  
越恐懼



與冀伯英

伯英有志於學其始也正然僕於伯英厚有一言願以獻也夫學如積水其積愈深則其流愈遠若曰我如是是亦足矣吾恐溝澮之盈其涸可待也吾里有子史子伯英盍從而問之

答元簿

某與公別閱再歲亦聞至涇既久念遣一書致殷勤不可得也委教先之陳義甚偉禮文繁縟施之他人可也

而僕與公將安取此哉愧感不勝言高才正學又輔之以家傳沉涵停蓄益大以肆少湏俟之即有褒擢矣某百無一有忽躡據英游馳驚之地譬如窶人無故而得千金鮮有不作奇崇者得深卿書意甚憐而教之乃溢於牋牘者皆頌而不規深卿猶爾他人尚安望耶不敢當別駕先生才一再見今已揚旌東上安問必絡繹於塗也所甚喜者又識少公所甚恨者深卿在焉耳

與淮漕

某官以清介律百吏以忠厚恤群刑推布德澤敷錫黎庶列城幸矣顧舊德宿望上所倚注宜朝夕左右論思獻納某備數於茲猶得瞻風采於朝廷也

與舒州王守

龍舒兩淮名鎮治道清淨民以寧壹甚盛德也惟梗亮之操純茂之氣薦紳仰為儀表當還本朝增重形勢欽惠一州非其所耳佇慶三節之行賓客之舊當先衆人候見於國門外矣

與淮東吳漕

某輒有白事海陵從事晏鼎元憲之世尚書之姪篤於節義守其家法賢矣久罹憂患甫得此官而遇明使者當路以身受察幸也惟執事激濁揚清賢不肖無所隱亦惟部有此士似未可以衆人視之也某未見君子敢冒言之罪且安辭

與王越帥

某望元戎軍府一水耳繫官於朝莫覩橐堽戢露威儀

之盛馳神而已春氣漸融伏惟藩屏王室談笑有餘台  
候萬福東人受賜日益深厚宣室思賢滋切廟堂俱有  
裏言趣召來歸匪朝伊夕敢願保綏至和以俟三節之  
行幸甚

某敢有白事忠州文學江蹈雅有學行齟齬不偶眵昏  
頭白僅得攝官去冬自三衢徒步入關已參吏部選亦  
嘗奉祠太一矣適嗣歲多休假待命兩月部中乃告示  
須由本貫州縣次第保明方應格法勢極狼狽謹取其

錄白一宗文書拜呈敢望台慈亟賜報發庶使羈旅得  
免滯留一官得調皆門下之賜也其人勅牒已經部中  
驗視去介不敢附託併蘄台照

答劉司戶

甲戌期集纔一再見廣衆不容接款旋各引去於今悵  
然初亦不知安所居調何官也故尺紙不至左右慕用  
之誠何自見哉高義絕倫遠貺翰墨反復把玩若握手  
相勞苦喜可量耶獨謹厥藏永以為好

元實之文行不當為諸侯客豈天欲厚所養而遭其進耶潯陽江山追尋昔人感慨處政自可以資弄筆亦何有不快於一出入息頃哉願少遲之當有為元實稱於朝者

于湖集卷三十六

謹案卷三十四第二頁前六行待寫昭君怨原本  
寫訛寓今改

第九頁後二行楓葉荻花秋瑟瑟原本瑟瑟訛索  
索據長慶集改

第九頁後三行我自忘歸原本自訛醉據毛選于  
湖詞改







總校官庶吉士臣張能照

校對官中書臣葉蘭

謄錄監生臣鄧培善

謄錄舉人臣馮蓋

欽定四庫全書薈要

集部

于湖集卷三十七至  
四十

詳校官助教臣謝登雋



欽定四庫全書薈要卷一萬五千七百四十七

集部

于湖集卷三十七

宋 張孝祥 撰

尺牘

董總領 革



如雲恩威流行形勢增雄賢於長城遠矣惟是潛藩舊  
賓末登侍從者執事等一二人耳此豈久於外寄哉况  
茲明試備著勲績所當褒擢為奉使典州之勸又非獨

以恩舊用也式迺其歸副此羣僎

虞并父

某自甲戌期集一見君子即為萬里之濶雖聲迹差池貌不相聞然意氣相傾殆若朝夕與游處者再來中都多見蜀士談道文行器識之偉且言渠州之政為西南二千石最念當何時見之居悒悒也屬聞大臣論薦於上有詔徵還旦旦以望舟虞之臨期與朝士大夫爭先快覩既審至國門復以微恙滯留欲遣問訊因循未果

昨在掖垣知賜對有日方喜神明清復對啟寵靈忽奉  
誨告陳義溫密褒稱過情某拜嘉不獲辭有愧而已凡  
蜀之士文德名世者自漢以來何代無之本朝獨盛頻  
年尤輩出而吾同年兄又蜀人甲乙推者伏想發揮遠  
猷克合上旨遂躋清切某托契不薄與有光焉謁制是  
縻無緣造請朝路解后瞻際有懷併頌面致

張大監

歲晏苦寒共惟神扶偉幹台候萬福伏念某二年中都

數獲款侍仰蒙篤宗盟之契獎予非它人比感激恩義  
銘鏤不忘大監尊翁以老成舊德儀刑本朝乃慕從赤  
松子游褰裳去之寓直祕府均逸閑館高名全節照耀  
宇內惜乎上東門外祖席不張洛陽丹青未傳繪筆為  
闕文也豈諸公貴人欲挽留行軒未遽許遂終然之志  
姑以是致意也耶一自請違已再旬浹尊信道德卷卷  
蚤莫即日某錄錄官下為養苟祿無可言也日望詔起  
慰此僊佇

代揔得居士回張推官

某承喻宗盟深悉雅意某家世歷陽之東鄙自先祖始  
易農為儒或云唐末遠祖自若湖徙家蓋文昌之後文  
昌諱籍見於唐書烏江人也紹興初某宦學吳中拜識  
司勳以先人與司勳有鄉里學校之舊實父執也遂拜  
司勳視拜叔父之禮亦猶曲江通燕公之譜系云爾茲  
承嘉命敢不奉以周旋也

胡帥



屬者公在新安嘗因還使寓一紙書異時公易鎮淝水  
某家在歷陽於公為部中民乃未能奏記典籤先辱下  
教以感以媿即日不審卧護邊瑣天相忠勞台候動止  
萬福孝肅公一代偉人名蓋中外其忠言嘉謨既已行  
之當時補衮職而起民病遺藁所傳又當使凡為士大  
夫者家有而日見之乃今先生所以發揮之意有在於  
是於名教甚惠某亦與拜賜幸矣編修所載王定國甲  
申雜記一事實某錄以遺潘思濟恐欲知也先生政聲

流聞行矣召歸更乞視時節宣垂副傾禱

淮西吳漕

某側聞鄉里耆舊誦說執事之政嚴而不苛寬而不弛吏畏民愛從容辦治某愚不知古不知西京所謂循吏定能如此否屬者朝廷深知歷陽治行謂此兩淮凋弊之民欲拊摩生聚之必得豈弟慈祥如門下者朝廷取二千石高第趣建外臺俾專刺舉昔之睽壤地者今受察下執事簡注深矣伏惟君侯推所以惠歷陽者惠兩

淮之民又將以惠兩淮者惠天下天下幸甚昔者某是部中受賜一人之數今猶昔也伏惟執事尚終芘之大人家毗陵以私幹覲至某官下謹自具啓狀

某比承擢自守藩將漕兩淮惟茲西州久孚惠政不勞設施坐以無事某也託芝蘭之契修桑梓之恭嘗附啓緘少陳贊喜今計闕徹矣

某晚出寒鄉誤蒙拔擢為郎滿歲遽躡殿坳實繁推揚褒寵訖用臻此辭不獲命跼蹐靡遑重勤賜教禮文繁

縟益深感著薄遽占謝未盡萬一

淮鄉百戰之餘雖朝廷委曲調護然瘡痍迄未平也矧  
茲歲雨暘不時農末俱病夫欲輕徭薄賦振廩勸分布  
宣寬大之恩類非俗吏所能非執事尚誰望也仰恃未  
照輒敢肆言亦明使者周爰咨諏之意乎恐懼而已

蔣烏江

家君頃掾海邦實獲事先公莫府又從公家諸父游甚  
厚小人於門闌不為無事契也平昔未遂識面而今茲

乃得公為吾父母國之宰抑何幸耶方念遣書竟先委教意親禮縛非所宜得感愧而已

烏江罹頃歲寇盜視它縣尤酷遺民當平時百一二歲輸王官才吳中中人一家產而往者置吏數不良更侵漁之益不聊生矣天其或者否極則泰而執事實來下車屬爾而仁聲義氣已敷與旁薄於百里之內可賀也上方深詔中外舉縣令之最以勸願執事勉之而已無替其初勿謂烏江遠而有不聞幸甚

某比得家君書具道長者調護之意甚厚感著亡歿政  
成事簡亦復有追游之樂否項亭面山枕江四時風煙  
皆可以寓目若湖渺漫百里方舟載酒不減水鄉勝處  
異時民與官不相安則此地皆愁嘆呻吟之迹今日賢  
令尹過之何往不宜也

與黃監廟

某昨者伏蒙某官不鄙夷之臨顧甚寵且獲略聞議論  
之英發感服亡喻奉告又教以藥石益用歎仰蓋某以

為旦暮之憂者惟執事同之武陵始不知其悍驕如是  
退乃得其顛末方此料理則諫省既奏疏矣勢當復更  
定也未遽西去否儻尚再見何喜如之侍傍願致下悃  
此紙勿以示餘子甚幸

定海趙丞

某每聞親庭稱賢得之仲父尤詳也中間來朝蒙訪尋  
適以齋祭不得一見至今歎然邇風長懷有辭莫謝既  
辱鄉里末契而舍弟復得聯姻魏公侍郎之家益托餘

光喜可知也承已及瓜行且代歸何當此來冀遂款密  
區區併湏傾盡

高應辰

某寒鄉晚出內視歉然不知何以受知丞相而驟茲特  
達成就之共惟此恩不可論報不可稱載意者七兄以  
某辱在末契愛忘其醜侍坐之間嘗借餘論有以薦進  
也自冒恩除粵今由昔恐懼跼蹐又不果詣光範稟謝  
長者乃貽書問勞益用慚感伏念不獲命也已將終始



覆護之者舍師門尚安歸耶應辰念之

李文授

某欽服參政名德師表一世家法修明昆令季彊而執事好學自立又八龍之無雙者也蓋欲納交未敢耳昨從範道左右過相推與頗傾意氣某何自得此感慨不忘也屬有謁制無緣造門休沐之日願賜臨焉

監司

主上獎用仁術敷求民瘼故出節遣使循行郡國吏自

二千石咸受察焉執事以通才正學肅將明命宣上德  
紆下情海山幽阻之民如在輦轂嗣聞賞最趣還漢京  
發所蓄積以裨遺忘幸甚

某寒鄉晚出獨學寡聞備數省闈日虞顛躓敢圖誤寵  
擢寘殿坳靡獲懇辭若為稱塞伏惟門下既已委曲推  
與訖用臻此復當藥石傾盡俾免於戾幸也

某伏蒙遠遣騎吏馳貺書牋辭采絢麗旨趣粹密溫其  
如德範之美使人意消矣獨愛忘其醜褒稱過情藐然

陋質豈堪黼黻愧感無以諭謝也

帥臣

長樂軍府之盛甲於諸鎮地以古雄寄以遠重某官橐  
兜戟纛長茲成師兵政整暇治道清淨隱然金湯中外  
震疊佇觀疇庸歸侍帷幄丕振賢業益尊主威幸甚幸  
甚

謝景思

屬者某官會朝漢京奉萬年之觴某數望見於殿門雖

接侍濶踈然一瞻德範固使人意消矣使節還臺坐閱  
弦晦寤寐緒風西鄉獨寫

某始學操筆時侍御者固以文章議論為英俊稱首翔  
翔中都風采暴然今爾許時矣而猶為此官可為永嘆  
上方兼覽賢豪追錄勲舊人門並用非公誰宜行有裏  
言也

某待罪省闈日增愧懼豈期假寵躡侍殿坳此必諸公  
長者游談過助轉而上聞故有是也第獨學寡陋而冒

論思之職將何以稱塞明詔惟無遐心而有以告之又幸也

某伏蒙遣騎馳貺華緘粲然黼黻下賁孱懦斯榮也祇以重其愧也不腆之文謹以薦意匪敢為報願賜觀焉

趙南安

執事以諸王孫與寒畯角逐取科第赴事功今五十年矣而猶為二千石公論稱屈時方急賢公卿薦引無虛日即有裏言也茲承積闕閱賜三品服章服與德對是

可貴也無緣叙慶但切馳情

妙喜

賢上人歸具書因循久不嗣問瞻仰良極即日不審何  
如伏惟於慈悲願海為大津梁清涼寶山散甘露雨有  
識無識隨見隨聞悉皆濟度悉皆解脫弟子無緣頂禮  
徒勤善頌謹狀

于湖集卷三十七

欽定四庫全書薈要卷一萬五千七百四十八

集部

于湖集卷三十八

宋 張孝祥 撰

尺牘

左相送御書獎諭

某微賤不肖早上輒冒齋斧之誅敢以獎諭石刻為請  
重蒙某官恩慈下及即日分賜共惟聖君褒字之褒所  
以發揮元宰大人精粹之學昭示萬世某何者廼於私  
家獲藏別本榮光焜耀里巷增輝即容躬詣鈞屏叙謝



仰祈鈞照

左舉善

先生在西湖煙雨中與南北兩孱顏晤語而小人坐塵  
海此仙凡殊途也猶且寄聲相勞苦此意豈可忘哉明  
若得暇當走隱居又須遣西子濃抹而迎前復淡粧則  
難行矣

汪季通

辭奉名誨坐閱歲時瞻遡卷卷有懷莫寫浙河東西可

朝發而夕還也書牋闕然夫復何托獨相與傾意氣則固若同席接膝之密頗亮此意否

季通人物學術當亟登館閣而猶為此官豈大將厚其所養故遲之耶退食雍容專意已事涵泓演迤不可涯俟使人望而歎耳

某蒙示書辭甚厚第賤啓過禮未敢祇命同年義均兄弟而復有此耶豈如上林子虛姑藉此騁辭乎不然則繆敬而欲其疎耳某不敢効執事之失輒自削去非簡

也自茲仍望以幅紙為約

都吏部賢知賢也某豈敢開薦口姑欲贊都公得士繼此當作記累左右

張侍郎

侍郎自布衣以道德文章師表天下又卓然以公輔之望歸先生者餘三十年矣大而不容身屢挫而道益伸今雖里門宴居朝野善類恃公以為主盟敢乞精護寢興垂副蕲鄉

某童無所識皎然此心願以身自託於門下庶幾不為  
小人之歸惟古者弟子所以承師之義未嘗以書傳也  
今乃一再拜教溢於牋翰顧皆非某所宜得於先生者  
蓋未嘗承顏接辭則宜先生之不知某也先生儻有收  
拾之意繼今以往請受命

磨勘謹馳納初欲就此積閱再下朝奉郎既料理矣而  
來使踵門云先生今受告當以表謝索此書亟某不敢  
復留文書復來願以見諉也

興國章守

某惶恐春夏之間使者會朝漢京某數以望見為快彌  
時曠於馳問坐有傾邇所臨遠在江表介於大都隱然  
為長雄者以人重也方今急賢計有裏言惟冀崇衛以  
湏召節

吳尉

某獲與春卿同登科第又得從執事游雖未暇朝夕晤  
言然意氣相傾則如平生驩矣瑰偉之辭永以為好時

一把玩如見德人也何當再集遡風獨寫

執事潛心正學志其遠大至於翰墨餘事猶超軼絕塵  
如此真吾黨之士所敬畏者而損書云云猥相俎豆大  
過所望又不敢辭有愧而已匆匆修報言不盡意

臧宰

洪左史於人謹許可獨稱執事之賢不容口士大夫黜  
來者又皆道撫字慈惠之美願托從游久矣何當胥會  
遡風獨寫

朝廷方留意縣六百石戒飭奉使典州使以最聞有如  
治行正當舉以應詔何尚未聞也

張仲固

某昨者公在寶婺一書往來久不嗣音但有愧悵某踈  
遠忽蒙恩除躡據通津此鼓鐘饗鷄鶩也豈平生故人  
揄揚過實轉而上聞耶貽書甚寵尤見交游相予之意  
獨以頌不以規非所望耳薄遽未盡謝意伏惟恕察  
大資政歸老於家子弟固將寵焉矧某官學行志業自

為羣儒稱首儒先學宿皆所推讓其擢用固無疑矣而  
召節尚稽所未諭也

代摠得居士與魏彥誠

某請違德誼欲忘歲月昨者執事初還位著馳書贊喜  
伏蒙報教所以崇篤眷撫之意溢於牋牘區區感銘屬  
鼠輩聚寇光黃之間被旨督捕孟冬首途此月既望乃  
歸坐此疎於嗣問顧尊鄉之心則不然也伏冀垂察  
主上深念淮濡之民生聚教訓有年數矣而疲瘵之俗



迄今未蘇乃眷北顧以執事專刺舉撫綏之任伏惟開  
濟之資追紹前輩豈弟之政為時吏師歛而施之一方  
直餘事耳而某也廼得分末光丐餘潤以免於戾其何  
幸如之伏惟財幸

徐給事

某惶恐死罪因循遂踈問訊但得之往來之人先生既  
遂雅志意况益佳微恙滋以平復父子相視喜慰抃躍  
一再從養正書中獲聞動靜尤以釋懷即日秋氣淒厲

恭惟宴坐觀物神扶耆壽台候萬福天子傾心以湏大  
老引疾屢辭迄遂掛冠之高樞極久虛人望彌屬願臻  
六氣之和以俟黃麻之告也某為郡既無善狀而水灾  
橫被數州一日千里饑民不溝壑即為盜必矣控請於  
朝乞闕官稅既荷恩許但常平帑廩已竭仰哺之人無  
數去麥秋甚遠其將何以濟此也邊報無它吳中亦復  
缺秋田之望奈何親庭已自具書侍見未期伏乞導迎  
鴻祉倚湏枋用

賀參政

仲冬之月嘗具劄子仰干鈞聽負罪屏處不敢時以姓名自達惟是區區尊依盛德慕用恩紀朝夕於心未始間斷歲律行盡恭惟旄麾在道天相忠賢鈞候動止萬福參政先生全名高節照映中外揚厯三朝聖天子深所倚賴肆敍明命往聘殊鄰將使中原遺老瞻望馬首益堅思宗之心天下幸甚某出入門闌積有年數獨恨不得充僉從效奔走引睇行府神輿飛馳政此苦寒敢

乞為宗社生靈加衛啓處亟聽來歸大人昨蒙朝廷委  
捕黃賊今遂擒馘而歸但日來所聞北耗政爾紛紛伏  
想廟筭自定應之有餘某官歸期必在三月載筆為誰  
或云曾中躬亦在行途中可以陪燕譚也子雲近嘗得  
書嘗至舟次迎拜否

徐左司

某自頃拜書候使節之歸旋即侍親來宣城異縣客寄  
憂虞萬端杜門不敢與人事接是故久疎遣問忽拜真

帖之貺疊疊數百千言駢珠疊璧竄人之所未識又得之於留落放廢衆人躡藉之餘有懷感著當如何哉麥秋欲晴既晴輒雨不審去天尺五台候起居復何如伏惟參釐萬微嘉政美澤陰被宇內宜有福祥來相君子某屏迹諸况如前所云但得水菽足以養親藜藿足以蓄妻子無諸病則已官屋雖敝然某遂假以為逐臣之居恐復有以為罪者環視茫然不知所計長者將何以教之也彌綸中臺亦既更歲華問休暢善類引望大用

猶稽此何為耶吾儕小人尤日日以冀也長公浙西之  
除直為歸觀之階耳方丈比得書手足之戚殊不能堪  
畿右之行得免長者必賜調護也瞻望雲霄邈然未有  
侍見之日仰乞為斯文崇養亟聞除目之播

某鄉來奏記已而郵筒拜初冬所下教政以大人去官  
因循不辦治報愧惕漠北之還聞諸道涂長者盡得其  
要領以復於上伏想廟論必已制勝於萬全然則在我  
之策孰為之先耶往者大人効官邊鄙二年其久虜之

情偽知之為詳屢以所見聞於朝獨以踈遠不賜省察  
耳今茲放逐尚口乃窮豈敢復有云也諸賢輻湊來廷  
強國尊主真成餘事如某輩得一廛躬耕自食其力父  
子團聚畢命丘樊它何敢知耶伏惟長者尚憐其情而  
照之

于湖集卷三十八

欽定四庫全書薈要卷一萬五千七百四十九

集部

于湖集卷三十九

宋 張孝祥 撰

尺牘

劉兩府

某幸甚昨者江行遂獲進拜榮戟恭惟領軍開府相公  
道德勲業蟠際天地內洽草木外薄夷虜中興以來一  
人而已况珠幢玉節奉詔東下先聲所暨山川震疊賓  
客如雲冠蓋相望士於茲時蘄一望塵而拜猶恐無因



而至前某也晚出不肖又方放棄湖海持刻修謁亟蒙  
賜見溫顏顧接已過涯分既又親屈英袞從以千騎訪  
之於寂寞無人之境經綸之成謀宏濟之英畧開示紬  
繹了無疑間卓乎偉哉弗可及已嘗病茲世義冠結綬  
車載斗量皆齷齪為身謀不足與共事無強人意者自  
承恃相公以來於今十日竊自慶抃廼知名世篤生人  
傑湛乎淵渟宰乎獄峙至於得時而行雷厲風飛桑蔭  
不徙大功克建則亦歛然退託於不能之地弗以一毫

留曾次求之古昔有道之士從容應世如此耳即日不  
審次舍何地土思見公與百執事都人士女望公之來  
何啻渴饑恭想小留鎮江亟以介圭去朝帝所區區有  
懷顧非筆舌所能宣盡姑致歸鄉之意仰冀憐察

代摠得居士與葉參政

某仰惟相公昨者登貳西府有識之士固已相慶知相  
公非苟富貴者得時而行必大有以慰中外之心既而  
又相慶曰敵之情偽深矣相公親涉其庭且究知之將

為上盡言於是相公來歸天下傾耳以聽廼七月丁酉相公進長樞庭而郵置所傳相公避遜之章所以復於上者蓋卓然以今日之事自任又傳聞相公歸自北鄙即於昕朝力陳機會之不可失敵謀包藏宜深為備天聽既回國勢自尊帷幄所籌罔不慰愜社稷幸甚生靈幸甚竊謂朝廷狃於和議將二十年小大之臣以兵為諱軍政不修邊備闕然長淮千里東南恃以為藩籬者一切置之度外而彼兵力之聚麀凶嘯毒未嘗南鄉而

忘我自去春權場廢朝廷始聳然知敵意之所在將深  
圖之而上下議論或未然一日復一日又至於今今事  
迫矣天其或者將遂悔禍貽我宋中興之基於萬斯年  
用是降大任於相公當是責也左丞相湯公忠貫日月  
精慮微一食息之頃未嘗不憂念國家未嘗不垂意人  
物而往時諸賢人各有心或未知同寅協恭以濟鴻業  
今天付相公以此事上意如此天意如此相公之與湯  
公詎可不深鑒往事惟和惟一以共圖休功也哉伏惟

相公深念之饑者易食渴者易飲中原之人困於暴虐  
困於旱蝗困於力役死者比屋矣遺民思宗之心如遭  
水火而望救援其勢已急千載一時間不容髮伏惟相  
公深念之紹興初諸將用兵淮上亳泗徐沂之人簞食  
壺漿以迎我師師退敵復取之即盡屠其人以泄憤怒  
然民終不悔它日我師至焉其迎我如初去冬蔣州王  
俊但假托本朝名字淮北之人信以為然自蔡頴至於  
河北尅期響應會俊敗獲事雖不克然以此可見吾民

之心今我以一旅之衆渡淮則彼之鋤耨棘矜皆為吾  
用建瓴破竹莫捷於此獨恐朝廷憚於先發耳伏惟相  
公深念之王戚李三將忠勇自力義無返顧然發縱指  
示必惟其人宜得大臣一其節制事當豫定若必待赤  
白囊至而後為之應將無及矣伏惟相公深念之今日  
議事之臣翫歲愒日以相公與左丞相之所建立為不  
然者以十人而九秋冬之交虜或未動則是議者必雜  
然謂邊頭本無事湯公葉公過為之謀又將自怠以弛

吾備以挫奮義者之心患將益深悔且噬臍伏惟相公  
深念之某憂患摧傷之餘所欠一死登相公之門蓋自  
蚤歲晚節末路獲備使令受任之地實在窮邊平生志  
願庶其少見於此去歲單車赴古蔣適丁互市之變已  
而蒙恩攝帥除漕某生長淮甸知敵之情必不但已日  
夜究心心思為之憊蓋嘗縷縷白之廟堂至於十數丞  
相湯公深以為當然而某人微望輕動輒齟齬或者反  
以為罪坐糜歲月徒自慨嘆今者相公既專宥密之寄

深思熟慮日不暇給將以戡外侮而隆內治於斯時也  
竹頭木屑皆所不棄況如某受知之深者哉父子百口  
畢命驅馳指天誓心罔有二事伏惟相公憐而察之伏  
紙不勝忠憤激切之情

### 廟堂劄子

仰惟先生於從容無事之時不動聲氣為聖天子建萬  
世之長策遠視古昔實所創見一昨丙子詔書既下雖  
窮山幽谷婦人孺子亦皆感泣蓋所以慰率土之望昭



在天之靈杜紛糾之源一視聽之歸再造炎圖端自此日而今而後知金人之不敢侮我中國諸將之不敢輕我朝廷國勢日隆主威日振而先生之道德勲名能言之士所不得而稱載也某負罪屏處不得拜伏光範為天下賀然竊喜恩地茂勲先立使某啜菽飲水槁死巖谷之間猶有榮耀伏惟財幸

湯丞相

某比以本路水灾如許饑民無聊復迫夏秋流離道路

圜視無策乃卜中元節用道士說肅齋三日醮於府治  
奏章祈恩二十有五日本路漕司奉堂帖許令檢閱夏  
稅而得旨蓋十六日也恭惟聖天子出神天之本真應  
帝王之興起我大丞相以侍宸列仙來居上宰之位乃  
今蟣蝨微臣冒昧有請綠函宵升皇澤朝下垂應如響  
恩惠濃浹卓異之事實為創見某與此路數十萬生聚  
望闕扣頭不知以何仰報帝力與我相公全活之功也  
幸甚幸甚某在此雖極力以治荒政但賑給二事徒有

其名無以徧給今獨有修圩一事朝廷所當加意蓋今年圩不修則明年江上無田無田則無民矣修圩藉民力民藉官給之食以活而常平米既無餘則圩亦無自而修故今日急先務莫若於江上得熟處廣糴轉江而下積之蕪湖以湏水落興工此事參政周丈項在太平知之為詳伏望恩地速賜經畫米不欲多得二十萬斛庶可從容集事伏望大丞相念之不勝激切之禱

又劉兩府

某竊瞻國之盛衰必觀諸人望之用舍謝太傅逍遙東  
山雅意邱壑當時議者顧謂安石不起如蒼生何言若  
大而夸然卒之成肥水之功者安石也裴中立以讒居  
外兩河諸侯浸淫問鼎中立復相忠者懷而强者畏人  
望之用果如何哉自五月來朔方傳聞洶洶豈惟自江  
以北百姓東擔以待而江淞之間亦復騷然忽有郵書  
報相公開帥府以號令諸將制冊揚廷恩禮赫奕凡士  
大夫與夫閭巷之民田夫牧人莫不歡喜奔走更相告

語以謂相公既用則吾事必濟無復憂矣至於赤籍伍符則又踴躍抃厲以有赴敵致命義無却顧之意敵人震懾先聲所暨全軍盡駭偃旗而散嗚乎休哉古未有也恭惟某官不世之功成在旦夕便當肅清宮禁祇謁寢園某無似庶將載筆後車草露布以俟獻也

某以久不省祖塋自宣城暫歸歷陽村落一二日復西上矣民間恃相公近在維揚皆得自安惟是民兵一事朝廷憂懼近日復有約束分隸諸軍田野之人愈更皇

恐孔子曰以不教民戰是謂棄之周官井田之法春蒐夏苗秋獮冬狩其坐作進退固已閱習而猶曰不教者蓋謂未嘗教之以知禮知義知信知勇如子犯之所云也今之民雖坐作進退冥然不知乃欲驅之以當大敵民之死不敢自愛萬一沮吾軍勢悔將何及仰惟某官同國休戚知無不言況此淮民又屬戲下敢告相公具以利害達之冕旒將兩淮民社一切罷免豈惟十萬生靈皆出全護脫性命於鋒鏑而緩急之際不誤國事尤

其大者也伏惟相公垂情無以某小子而廢斯言熟計而亟圖之無任激切恐懼之至

于湖集卷三十九

欽定四庫全書薈要卷一萬五千七百五十

集部

于湖集卷四十

宋 張孝祥 撰

尺牘

辭潭州劄子

某伏見邸報某蒙恩差知潭州伏念某罪戾之迹方自  
循省大藩謀帥遽先造化曲成之私曷可稱述顧其情  
有不能自己者輒吐露於相公之前昨者廣西之役不  
遑迎侍違二年水菽之養一訊往還動湏數月親年益



高時親藥餌人子之心豈獲寧處欲望惻然推錫類之  
仁稍易江淮間一小壘俾得自効誓當糜捐圖惟報禮  
控禱僭瀆伏深震懼

劉舍人

某遠去師範屢更歲籥雖側聞尺一徵還陟烏臺長道  
山西掖演綸北門視草極儒者逢辰之榮事而某也宿  
負未洗久違賤奏欲以書為斯文賀莫之敢也追惟疇  
昔以諸生被獎拔懷恩未報引睇雲霄歸依何已

某恭惟先生經綸之業得時而用蓋將闡我國家太平之基掌帝之制獨當省署箴補袞闕體闕廟社繫衆人睥睨而不敢發先生回天於談笑之頃中興以來未有此舉也甚善甚盛惟天下自有公論抑某何庸贊嘆某竊承賜對內朝至於移晷君臣契合實啓興運暫即玉堂之舊將登袞位之嚴成命既傳孰不鼓舞某辱在門闌尤極欣感先生兩宮虛佇百辟具瞻告廷有期福祉咸萃更冀加衛茵鼎以副天下之望

先生以文章德業致身而分閭於外有此武功蓋英主側席寤寐將與共圖天下求而不可得者也召節之放雖庸人孺子咸知鼓舞可知公之德政矣門閭之舊嘗共掬溜播灑之役者喜當如何

某罪戾之迹蒙先生薦進之恩俾主留務雖成規具在可以遵行顧精神之運豈能仰及屢辭不獲皇恐祇命尚俟躬拜師門一一承教臨紙不勝懇禱之極某行役將及近境瞻侍之日端復不遠引領轅門時自抃蹈

劉樞密

某伏審易鎮要藩升華邃殿一面之託不啻九鼎重矣  
伏惟萬人之英明天子所簡敬豈重湖之地所當暫留  
開大莫府寬北顧憂付以萬世功業帝意可以卜見也  
某不勝宗廟朝廷之慶

某恭承先生經術文章議論名節近世儒宗蓋一二數  
至於英風義氣則千載一人今日廊廟尊安邊壘寧謐  
折衝之功豈無所自宰席尚虛而君臣之交中外之望

如此爰立告廷恐不容緩應變守文公所優為者太平之功自此一新天下之耳目矣

朱編修

某敬服名義願識面之日甚久非敢為世俗不情語也得劉丈書又見與欽夫書知且為衡嶽之遊儻遂獲奉從容何喜如之不勝朝夕之望

某昨日方從欽夫約遣人迓行李奉告乃承已至近境欣慰可量欽夫必授館不然當於我乎館也使令輩遣

前恐遠來者須更休耳應有委乞示下

風雨留人尊候復何如登臺詩彊勉不工出師表同上  
老兄遊山亦須待稍晴未可以遽千金之軀宜自愛惜  
洪濤際天溺馬殺人將安之耶

某平生慕用豈謂來湘中乃獲解后接款慰幸可勝言  
懷親遽歸苟留不得至今慊然人還一再奉賜書感服  
感服某老者采動東歸之興比已專介請祠力致懇諸  
公儻遂得之不旬月去此矣樞庭編摩望雖高然非所

以處元晦也意者姑借此為掀擢之漸耶此間諸事欽  
夫諸友書中必能詳言之政遠披承千萬珍護即登嚴  
近

敬簡堂記遂煩揮翰真可以託不朽但堂中之人於敬  
簡工夫殊未進湏士友不我遐棄時時訓厲之耳欽夫  
間相從未嘗不矯首奉思也黃君內艱可念仲隆想已  
趨朝更不作書懷英行已踰月臨行瘍作於背甚可念  
幸而即愈渠自去歲得渴疾此不可再也

某別去再見新歲懷鄉道義不能忘也自來荊州老者  
病甚思歸舟楫往來江上不復定處僕亦心志忽忽百  
事盡廢雖如元晦一書亦不暇遣乃兩奉誨教相予之  
意益勤內省愧惕不但不答書可以為罪蓋敬簡之功  
不進它日無以見吾元晦耳某自到官即請去凡六七  
最後乞致仕乞尋醫且欲不俟報棄官而歸諸公乃亦  
相察今復得祠祿矣近制不必俟代者已治舟楫載衣  
囊五七日便可離此劉丈之去奇哉偉哉此行至江上



當迂數程見之亦約欽夫又不知肯來否欽夫却數通書定叟將有遠役兄弟不能相舍張仲隆前後五劄議論過人皆某所不能言者歎服元晦闕期已及聞未有幡然之意如何如何某有田在謝家青山下屋十餘間下俯江流今歸真不復出矣元晦異時或欲覽江淮山川之勝乘興東遊則僕可以奉從容於梁山博望慈湖采石之間也此外惟為斯文珍重

某近因至城西於土中得一碑趺細視之良有刻畫蓋

明皇所注道德經幢也磨治之餘僅可識即以十夫掘取之其半在土中者甚完字畫非經生所能及已昇寘府中今裝褫一本去欽夫極愛之也經磨治處中有大穴蓋以載他碑者尤古類漢碑併遣上

楊抑之

屬者敷文奏課為二千石第一廼眷寶度實先帝謨訓所在陞華更直用報顯庸顧士大夫交口贊慶而某獨不遣賀牘誠以門下於此為不足道也不識執事尚照

其心否

癸未詔書凡今郡太守若部刺史之有治績者其各以  
叙補侍從之闕伏惟敷文莫宜此選矣尺一趣覲祇在  
早莫敢以私告某來歸親傍望建牙所在才數舍未皇  
具一紙書長者先之愧何可量也冬日邊地寒力不審  
臺候比復何如公守邊內則能固吾圉外則使裔夷歸  
心羊陸見稱徒以此耳但玉關人老不容不亟召歸伏  
惟與時御宜促裝以俟

某晚出叨踰所學未充猖狂妄行以速大戾隆寬貫其  
九死猶得奉祠既至濡湏靜掃一室終日危坐以省昔  
愆它無可言者臨出都時信伯既維舟矣亦蒙僮蓋至  
湖上存勞周渥此意不可忘也解榜見名得來示乃知  
小失意於上舍然來春自當巍中政爾無用此也

黃子默

某離長沙且十日尚在黃陵廟下波臣風伯亦善戲矣  
前日為子默作江西後社字茫然莫知所謂至湘陰館


中有題壁間二詩急雪黃花度初晴白石村者驚歎世  
間久無此作客謂此子默詩也歛然心服真可作社頭  
矣今日見計欽祖又誦數篇益竒蓋辭達於詩渾然天  
成風行水波偶入聲律非今之詩山谷之詩也幸甚斯  
文未墜於地時夜將半呼僮張燈作此紙且致怨於不  
我教又聞有李東老者詩亦佳獨不能以數句為僕北  
歸篋中裝耶儻不棄願馳一介送似欲誦之於岳陽樓  
南樓寒溪西山也





于湖集卷四十

財團法人  
佛陀教育基金會  
釋淨空 敬贈



總校官庶吉士 臣 張能照  
校對官中書 臣 禁 蘭  
謄錄舉人 臣 馮 蓋